

- प्रधानमंत्री नरेन्द्र मोदी कह्यो-लारला डोढ़ साल मांय देश मांय करीब 10 लाख नौजवानां ने सरकारी नौकरियां दीरीजी।
- मुख्यमंत्री भजन लाल शर्मा जयपुर मांय बणाया जावण वाळा राजस्थान मंडपम् रा मास्टर प्लान रो जायजो लीनो ।
- राज्य मांय मौसम बदल्यो-केई ठौड़ा हल्की बारिश व्ही।
- केन्द्र सरकार पांचवीं अर आठवीं कक्षा री वार्षिक परीक्षा मांय फेल व्हेवण वाळा विद्यार्थियां ने आगली कक्षा मांय दाखिलो देवण री नीति खत्म कीनी।

000

प्रधानमंत्री नरेन्द्र मोदी कह्यो है के लारला डोढ़ साल मांय देश मांय कोई 10 लाख नौजवानां ने सरकारी नौकरी मुहैया करायी ज्यी है। वे आज वीडियो कांफ्रेंस रे मार्फत 71 हजार ऊं बत्ता नुवी नौकरी लाग्या कर्मचारियां ने नियुक्ति पत्र दीना। प्रधानमंत्री कह्यो के रोजगार मेळा नौजवानां ने मजबूत बणा रह्या है। श्री मोदी कह्यो के सरकार री नीतियां अर फैसलां रे कारण देश रा गांवांई हलकां मांय नौकरी-धंधा रा नुवा मौका मिल रह्या है।

-----

श्री मोदी कह्यो के सरकार मायड़ भाषा मांय तालीम अर परीक्षा री मंजूरी दे र अर 13 भाषावां मांय भर्ती परीक्षा रो सुबीतो दे र खास पहल कीनी है। देश मांय 45 ठौड़ां रोजगार मेळा लगायी ज्यी। राज्य मांय ई अजमेर अर जोधपुर मांय रोजगार मेळा लगायी ज्यी। अजमेर रा सीआरपीएफ ग्रुप केन्द्र मांय केन्द्रीय कृषि राज्यमंत्री भागीरथ चौधरी नुवी नौकरी लागण वाळा 700 नौजवानां ने अर जोधपुर मांय बी.एस.एफ फंटियर मुख्यालय मांय राख्यी ज्यी मेळा मांय केन्द्रीय पर्यटन अर संस्कृति मंत्री गजेन्द्र सिंह शेखावत 200 जणा ने नियुक्ति पत्र संप्या। ई मौके श्री शेखावत कह्यो के केन्द्र सरकार कर्मयोगी पोर्टल री सुरुआत कीनी है, ज्यीं माथे मौजूद भांत-भांत रा कोर्स कर र नौजवान वां री कार्य क्षमता बधा सके है।

ध्यानजोग है के अक्टूबर 2022 ऊं 50 शहरां मांय लगायी ज्यी रोजगार मेळां मांय राष्ट्रीय स्तर माथे ऐड़ा 13 रोजगार मेळा लगाया जा चुक्या है। दूजी कानी बांसवाड़ा मांय काल जिला स्तर रो रोजगार मेळो लगायो जावेला।

000

मुख्यमंत्री भजनलाल शर्मा आज राजस्थान मंडपम बणावण री तैयारियां रो जायजो लेवण सारू अहलकारां सागे मीटिंग कीनी। वे कह्यो के दिल्ली रा भारत मंडपम री भांत जयपुर मांय बणबा वाळो राजस्थान मंडपम कला, संस्कृति अर पर्यटन ने बधावो देवण रो केन्द्र बणेळा। मुख्यमंत्री कह्यो के देशी सामान ने बधावो देवण सारू मंडपम मांय युनिटी मॉल बणायो जावेला। श्री शर्मा राजस्थान मंडपम रा मास्टर प्लान रो जायजो लीनो अर अहलकारां ने इण रो काम टेमसर पूरो करण रा हुकम दीना। मुख्यमंत्री तनोट माता मन्दिर हलका रा मास्टर प्लान रो ई जायजो लीनो। वे राज्य रा धार्मिक अर ऐतिहासिक गौरव रा प्रतीक ई मंदिर ने विश्वस्तर री धार्मिक अर पर्यटन ठौड़ रा तौर ऊं विकसित करण बाबत् कह्यो।

000

भारतीय जनता पार्टी रा प्रदेश अध्यक्ष मदन राठौड़ राज्य री मौजूदा सरकार रा एक साल रा काम-काज री सराहवणा कीनी है। आज जयपुर रा प्रदेश भाजपा मुख्यालय मांय खबरनवीसां सागे बातचीत करता थकां राठौड़ कह्यो के भजन लाल सरकार रा काम-काज ऊं जनता मांय खुशहाली आयी है। वे सुशासन दिवस अर वीर बाल दिवस रे मौके राख्या जावण वाळां कार्यक्रमों री जाणकारी दीनी।

000

पाली ज़िला रा नीमली औद्योगिक हलका मांय केंद्र सरकार करीब 11 हजार करोड़ रुपया रा खर्च ऊं सोलर हब बणावण सागे और केई काम करावेला। विधायक भीमराज भाटी आ जाणकारी दीनी। वे बतायो के इण ऊं मोटी तादाद मांय लोगों ने नौकरी-धंधा रा मौका मिलेला।

000

राज्य मांय केई ठौड़ां आज मौसम बदल गयो। सवाईमाधोपुर, चूरू, झुंझुनू, बीकानेर अर श्रीगंगानगर समेत कठे-कठे हल्की बिरखा व्ही। झुंझुनू ज़िला मांय चिड़ावा, मण्डावा अर बुहाना समेत केई हलकां मांय मोड़ी रात ऊं सरू व्ह्या हल्का मेह रो दौर रुक-रुक र चालतो रह्यो। राजधानी जयपुर मांय ई छांटो-छिड़को व्ह्यो। नीम का थाना मांय ई रुक-रुक र बिरखा व्ही अर तावड़ो नी निकळ्यो। डीग ज़िला मांय ई कठे-कठे छांटो-छिड़को व्ह्यो अर धुंअर रेहवण ऊं आवण-जावण मांय परेशानी आयी। सब ऊं बत्ती 10 मिलीमीटर बरसात चूरू ज़िला रा तारानगर मांय व्ही। राज्य रा आतूणी हलका मांय कठे-कठे घणी धुंअर रही। ऊगणी हलका रा बारां मांय ई कोहरो रह्यो। ई बीचे लारला चौबीस घंटा मांय पारो थोड़ो चढ़बा ऊं सर्दी ऊं थोड़ी साता मिली है। अलवर मांय 7 दशमलव 4 अर करौली अर जोधपुर मांय 9 दशमलव 7 डिग्री सेल्सियस न्यूनतम तापमान रिकार्ड करी ज्यो। ई रे अलावा घणखर ठौड़ां कम ती कम तापमान 10 डिग्री सेल्सियस ऊं ऊंचो रह्यो। मौसम महकमा रे मुजब आज कोटा, अजमेर, उदयपुर, जोधपुर अर बीकानेर संभाग मांय कठे-कठे हल्की बारिश रा आसार है।

000

पैली वाळा प्रधानमंत्री चौधरी चरण सिंह ने आज वां री 122 वीं जयंती रे मौके सिरधाभाव सागे याद कर्या जा रह्या है। ई मौके झुंझुनू मांय प्रभात फेरी निकाळी ज्यी अर महर्षि दयानन्द गर्ल्स कॉलेज मांय संगोष्ठी राख्यी ज्यी। पाली मांय कृषि विज्ञान केंद्र री ओर ऊं महिला किसानां ने ड्रैगन फ्रूट, थाई बर, बिना कांटा रा कैक्टस अर जैविक खाद बणावण री सिखावण दीरीजी। संसदीय कार्य अर विधि मंत्री जोगाराम पटेल सादड़ी मांय गायां ने गुड़ खिलायो अर किसानां रा भला सारू चलायी जा रही सरकारी योजनावां री जाणकारी दीनी। भरतपुर मांय पुष्पांजलि कार्यक्रम राख्यी ज्यो। ई मौके अलवर मांय वठे रा सांसद अर केंद्रीय मंत्री भूपेंद्र सिंह यादव री मौजूदगी मांय चौधरी चरण सिंह री मूरत रो अनावरण करी ज्यो अर किसान समारोह राख्यी ज्यो।

000

राज्य मांय मणाया जा रह्या सुशासन सप्ताह रा तहत आज भीलवाड़ा जिला री बिजोलिया पंचायत समिति मांय शिविर लगायी ज्यो। ई मौके विधायक गोपाल खंडेलवाल री मौजूदगी मांय लोगों ने पट्टा ई दिया ज्यो। चूरू मांय केन्द्रीय कानून मंत्री अर्जुन राम मेघवाल री मौजूदगी मांय कार्यशाला राख्यी ज्यी, जिण मांय ज़िला मांय चलायी जा रही जनता रा भला री न्यारी-न्यारी योजनावां अर नवाचारां री जाणकारी दीरीजी। बारां ज़िला रा बटावदा, चरड़ाना, मूण्डला, हरनावदाशाहजी, तिसाया, काचरी अर जलवाड़ा समेत न्यारी-न्यारी ठौड़ा प्रशासन गांव की ओर शिविर लगा र केई मामला मौके ई निपटायी ज्यो। जैसलमेर मांय जिला स्तर री कार्यशाला राख्यी ज्यी। कार्यशाला

मांय सीपी ग्राम पोर्टल, राजस्थान सम्पर्क पोर्टल माथे दर्ज केई मामला निपटायी ज्या। झालावाड़ मांय सुशासन सारू करी ज्या नवाचारां अर जतन री जाणकारी जनता ने देवण सारू जिला कलेक्टर री सदरत मांय जिला स्तर री कार्यशाला राख्यी ज्यी।

000

केंद्र सरकार पांचवीं अर आठवीं कक्षा री वार्षिक परीक्षा मांय पास नी व्हेवण वाळा विद्यार्थियां ने आगली कक्षा मांय दाखिलो देवण री नीति खत्म कर दीनी है। शिक्षा सचिव संजय कुमार खबरनवीसां ने आ जाणकारी दीनी। वे बतायो के ऐंडा विद्यार्थियां ने नतीजा रा दो महीना मांय ओजू इम्तिहान देवण रो मौको दियो जावेला, जठे ओजू फेल व्हे जावण री सूरत मांय वां ने आगली कक्षा मांय दाखिलो नी दियो जावेला।

000

कोटा मांय आज कोटा महोत्सव सरू व्ह्यो। लोकसभा अध्यक्ष ओम बिरला अर ऊर्जा मंत्री हीरालाल नागर ऊबा गणेश जी रा मंदिर मांय पूजा अर्चना कर र महोत्सव री सरूआत कीनी। ई मौके श्री बिरला कह्यो के हाडोती री कला संस्कृति अर पर्यटन री जाणकारी लोगां ताई पूगावण री सगळां री भेळी जिम्मेदारी है।

-----

महोत्सव रा तहत आज फूड कोर्ट, फोटो प्रदर्शनी, क्राफ्ट बाजार, अमृता हॉट, लघु उद्योग मार्ट और पेंटिंग वर्कशॉप रा कार्यक्रम राख्यी ज्या अर स्थानीय कलाकार सांस्कृतिक प्रस्तुतियां दीनी। सिंज्यां री पोर चंबल माता री महाआरती, दीपदान अर आतिशबाजी रा कार्यक्रम है। चित्तौड़ रा किला माथे राख्यी ज्यो मीरा महोत्सव ई आज पूरो व्हे रह्यो है। ई मौके गायन अर नृत्य रा कार्यक्रम पेश कर्या जा रह्या है। दूजी कानी भरतपुर मांय जिला प्रशासन अर पर्यटन विभाग री ओर ऊं दो दिन रो महाराजा सूरजमल स्मृति समारोह काल सरू व्हेला। ई मौके काल राजकीय संग्रहालय अर केवलादेव राष्ट्रीय उद्यान मांय मुफ्त प्रवेश दियो जावेला अर सुजान गंगा नहर मांय बच्चां ने नाव मांय मुफ्त सैर करायी जावेला। काल महाराजा सूरज मल विश्वविद्यालय मांय इण ऊं जुड़्यो खास कार्यक्रम राख्यो जावेला।

000